

Abenduaren 8an
MARIA BIRJINA DOHATSUAREN SORTZE GARBIA
Bilbao, Vitoria-Gasteiz eta Donostiako Elizbarrutietan
Seminarioaren eguna

Agurra

Mariaren erraietan gizon egin zen Jauna izan bedi zuekin.

Sarrerako Oharpena

Abendua Andre Mariaren hila da. Bera da itxaroten dakiena, bera da “Itun Berriaren Kutxa” Jaunak garbi eta eder prestatua. Berari begira ikasten dugu Eguzki berria onartzeko bidea egiten.

Gaur gainera Seminarioaren eguna dugu. Hauxe dugu goiburua: «*Artzain misiolariak*». Gure apaizagaiak, Kristo bezala artzain onak izatea nahi dugu eta artzain misiolariak gainera, Berri Ona toki eta egoera guztietara eramango dutenak. Otoitz egingo dugu guztien alde eta beraien heziketarako izango da gure diru-bilketa.

Ospa dezagun pozik Amaren jaia. Jainkoa goretsiz eta eskerrak emanez. Horrek lagunduko digu Eguberria prestatzen.

Damu-otoitza

Presta gaitezen Eukaristiarako, gure bekatuen barkamena eskatuz.

— Jesus Jauna, Espiritu Santuaren egitez Andre Mariagandik jaioa: erruki, Jauna.

— Jesus Jauna, munduaren azkena arte **gurekin** zarena: Kristo, erruki.

— Jesus Jauna, salbamena burutzeko etor**tze**koa zarena: erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Aintza zeruetan

Andre Mariarekin eta santuekin bat eginik eta Eliza osoarekin batera gores dezagun Jainkoa Aintza zeruetan [esanetz] kantatuz.

Otoitza

Oi Jainko,
egoitza egokia prestatu zenion zeure Semeari
Maria Birjinaren Sortze Garbiaz
eta, honen Semearen heriotza aurreikusirik,
garbi gorde zenuen bekatu guztitik Ama;
egizu, Maria Birjinaren otoitzari esker,
gu ere Zugana garbi irits gaitzela.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta errege bizi baita gizaldi eta gizaldietan.

Hitzaren liturgiari oharpena

Testigu alaiak izateko deia egiten zaigu. Erantzun dezagula Mariak bezala: «Hona hemen ni, Jauna, gerta bedi nigan zure nahia».

Lehenengo irakurgaia (Gn 3, 9-15. 20)

Genesis liburutik

Jaungoiko Jaunak gizonari dei egin eta honela esan zion: «Non zara?» Eta hark erantzun: «Baratzean ibiltzen sumatu zaitut eta, larrugorri nengoelako, beldurrez, gorde egin naiz». Jaunak orduan: «Eta nork esan dizu, larrugorri zeundela? Jatea galerazi nizun zuhaitzetik jan al duzu?» Gizonak erantzun: «Lagun ipini didazun emakumeak eman dit hartatik, eta nik jan». Orduan Jaungoiko

Jaunak esan zion emakumeari: «Zer egin duzu?» Emakumeak erantzun: «Sugeak atzipetu nau, eta nik jan».

Orduan Jaungoiko Jaunak sugeari esan zion: «Hori egin duzulako, madarikatua izango zara abere guztien eta landako pizti guztien artean; sabel gainean ibiliko zara narrastaka; zure bizitzako egun guztietan hautsa jango duzu. Haserrea sortuko dut zure eta emakumearen artean, zure jatorriaren eta harenaren artean; honek buruan emango dizu, zuk orpotik helduko diozunean».

Gizonak emazteari «Eva» ezarri zion izen, bizidun guztien ama delako.

Erantzun-salmoa (Sal 97, 1. 2-3a. 3c-4)

Kan -ta Jau - na - ri kan - tu be - rri, e - gin bait di -
tu hain - bat ha - rri - ga - rri.

Kanta Jaunari kantu berri,
egin baititu hainbat harrigarri.
Bere eskuinak eman dio garaipeña,
bere beso santuak. R/.

Ezagutarazi du Jaunak Beragandiko garaipeña,
agertu du atzerrien aurrean bere zudentasuna.
Oroitu da bere maitasunaz,
Israel etxeari dion leialtasunaz. R/.



Ikusi dute lur muga denek
gure Jainkoagandiko garaipena.
Lur osoa, egiozu txalo jaunari,
egin oihu eta irrintzi, egin eresi. R/.

Bigarren irakurgaia (Ef 1, 3-6. 11-12)

San Paulo Apostoluak Efesoarrei

Bedeinkatua izan bedi Jainkoa, Jesukristo gure Jaunaren Aita, Espirituaren era guztietako bedeinkapenez, zeruan Kristorengan bedeinkatu gaituena.

Harengan aukeratu baikintuen, mundua sortu baino lehen, Haren aurrean, maitasunez, santu eta errugabe izan gaitezen.

Aurrez aukeratu gintuen bere semeorde izateko, Jesukristoren bidez, bere nahiaren onberatasunez; bere Seme maitearengan hain ugari eman digun graziaren aintzak Bera gorespenez bete dezan.

Kristorengan oinordeko gertatu gara gu ere; horretara deituak izan gara, gauza guztiak Berak nahi bezala egiten dituenaren erabakiz. Eta Kristorengan uste on izan genuenok, Jainkoaren aintzaren gorespen izango gara.

Aleluia (Lk 1, 26-38)



Poztu zaitez, Maria, graziaz **bete** hori:
 Jauna zurekin;
 bedeinkatua zu emakumeen artean. R/.

Ebanjelioa (*Lk 1, 26-38*)

Homiliarako argibideak

Edertasunaren jai

Maria Sortzez Garbia dela esaten dugunean, bi gauza esaten ditugu, bata negatiboki eta bestea positiboki: negatiboki, jatorrizko bekatuaren «orbanik» gabe sortu dela; positiboki, grazia osoz iritsi dela mundura. Hitz horretan adierazia dago Maria den guztia. Jai honetako Ebanjelioak azpimarratzen du, aingeruaren hitza berriro entzunez: «Poztu zaitez, graziaz betea, Jauna zurekin dago».

Grazia hitzak bi esanahi ditu. Mesede, barkamen, amnistia... esan dezake, grazia lortu duen heriotza-kondenatu bati buruz ari garenean bezala. Baina edertasuna, lilura, adeitasuna... ere adieraz ditzake. Gaurko munduak ondo ezagutzen du bigarren grazia-zentzu hori, are gehiago, ezagutzen duen bakarra da.

Biblian ere bi esanahi horiek ditu. Lehenik eta behin, doako eta merezi gabe jasotako jainkozko dohaina adierazten du, bekatuaren aurrean barkamen eta erruki bihurtzen dena; baina gero, jainkozko alde horretatik datorren edertasuna ere adierazten du, graziazko egoera deritzoguna.

Mariarengan bi grazia-esanahi horiek aurkitzen ditugu. Bera «graziaz betea» da, batez ere mesede eta aukera bakar baten xede izan delako; bera ere «saritua» izan da, hau da, Kristoren graziak dohainik salbatu du. (Bera jatorrizko bekatutik gorde zuten, «Kristoren merezimenduak aurreikusteko»!). Baina «graziaz betea» da, halaber,

Jainkoak aukeratu izanak distiratsu bihurtu duelako, orbanik gabe, «eder», «tota pulchra», Elizak jai honetan abesten dion bezala.

Sortzez Garbia graziaren eta edertasunaren festa bada, horrek badu zerbait esateko. Edertasunak denok ukitzen gaitu, giza ekintzaren pizgarri sakonenetako bat da. Harenganako maitasunak guztiak batzen gaitu. «Mundua edertasunak salbatuko du», esan zuen Dostoievskik. Baina horri erantsi behar diogu, mundua galdu ere gal daitekeela edertasunagatik.

Zergatik bihurtzen da hain maiz edertasuna tranpa hilgarri, delituen eta malko mingotsen ondorioz? Zergatik gertatu dira edertasunaren pertsonifikazio asko, Homeroren Helenatik aurrera, luto eta tragedia izugarriak eta edertasun-mito moderno asko bukatu dira (Marilyn Monroeren azkena) hain modu tristean?

Pascalek dio hiru handitasun-ordena edo balio-kategoria daudela munduan: gorputzen eta gauza materialen ordena, adimenaren eta jenioaren ordena, eta ontasunaren edo santutasunaren ordena. Lehen mailakoak dira indarra, aberastasun materialak; bigarren mailakoak jenioa, zientzia, artea; hirugarren mailakoak ontasuna, santutasuna, grazia.

Maila horietako bakoitzaren eta hurrengoaren artean alde ia infinitua dago. Jenioari ez dio ezer kentzen edo jartzen aberatsa edo pobrea, ederra edo itsusia izateak; haren handitasuna maila desberdin eta goragoko batean kokatzen da. Era berean, santuari ez zaio ezer gehitzen edo kentzen indartsua edo ahula, aberatsa edo pobrea, jenioa edo iletratua izateagatik: handitasuna plano desberdin eta infinituki handiago batean kokatzen da. Gounod musikariak esaten zuen santutasun-tanta batek jenio-ozeano batek baino gehiago balio duela.

Pascalek handitasunaz oro har esaten duen guztia edertasunari ere aplikatzen zaio. Hiru edertasun mota daude: edertasun fisikoa edo gorputzena, edertasun intelektual edo estetikoa, eta edertasun moral eta espirituala. Hemen ere, plano baten eta hurrengoaren artean, tarte handia dago dudarik gabe.

Maria Sortzez Garbiaren edertasuna hirugarren planoan kokatzen da, santutasunaren eta graziaren planoan, are gehiago, bera da plano horretako gailurra Kristoren ondoren. Barne-edertasuna da, argiz egina, harmoniaz, errealitatearen eta Jainkoak emakumea sortzean zuen irudiaren arteko korrespondentzia perfektuaz egina. Eva da, bere goraldi eta perfekzio osoan, «Eva berria».

Denok egin dezakegu zerbait, mundu eder eta garbiago bat etorriko diren belaunaldiei emateko, bestela, gure etxean eta bihotzean begietako leihoen bidez sartzen uzten duguna ondo aukeratuz. Mariarentzat bizitzako abiapuntua izan zena, sinesmen ororentzat, helmuga da. Izan ere, Elizak ere «orbanik eta zimurrik gabea, santua eta garbia» izan behar du (Ef 5, 27).

Gaur, Seminarioaren eguna ospatzean hauxe dugu gogoan, hasieran aipatu dugun moduan: «*Artzain misiolariak*» behar ditugula. Behar ditugu Jainkoaren deia entzunaraziko digutenak, beraien egintzen bidez entzunarazi ere. Otoitz egin dezagun beraien alde. Otoitz egin dezagun Jainkoak deitzen jarrai dezan. Otoitz egin dezagun dei horrek erantzun sendoa, baikorra, maitetsua izan dezan.

Jainkoaren herriaren otoitza

Andre Mariarengan gizakien salbamena hasi zuen Jainkoari, eska diezaioگون Jaunaren bidera ateratzeko indarra eta laguntza:

Erantzuna: Zatoz, Jauna, gu salbatzera!



- Salbamenaren betea Mariarengan aurreikusi zuen Jaunak, lagun diezagula Elizako kide guztioi Kristoren Amaren edertasuna islatzen. Egigun otoitz. R/.
- Andre Mariarengan Salbatzailea ernearazi zuen Espiritu Santuak berak mundua bete dezan eta gizaki guztiengan Jainkoaren Erreinuarekiko gogo beroa sorrarazi dezan. Egigun otoitz. R/.
- Gure apaizgaiak jaso dezaten kristau-elkarteen harrera eta beroa eta Andre Mariaren antzera Jainkoaren aurrean lanerako prest agertuko diren apaiz bokaziodunak gure artean falta ez daitezen. Egigun otoitz. R/.
- Andre Mariari begira, berak bezala Kristo onartzeko prestatu gaitzen eta Haren jaiotzako jaiak bihotzez ospa ditzagun. Egigun otoitz. R/.

Jainko gure Jauna, Andre Mariaren sortze garbian salbamenaren egunsentiak argi egin dezan nahi izan duzu; entzun gure otoitzak eta egizu Elizaren ekintzaz eta testigantzaz gizaki guztiek ezagutu dezatela zugandik datorkigula salbamen betea. Jesu Kristo gure Jaunaren bitartez.

Eukaristiaren liturgiari oharpena (Diru-bilketa egiterakoan)

Gaurko diru-bilketa gure Seminarioari laguntzeko izango da. Gure apaizgaiak ongi presta daitezen lagunduko dugu, baita bokazio pastoraltzak harrera ona egiten jarrai dezan ere.

Prefazioa: *Festaburuari dagokion berezia*

Jaunartze-ondorengo otoitza

**Jaingo gure Jauna, Maria Birjinaren Sortzea
jatorrizko bekatutik garbi gorde zenuen miragarriri;
hartu dugun sakramentu honek senda ditzala guban
bekatu horren zauriak.
Jesu Kristo gure Jaunaren bitartez.**

Bedeinkapen Nagusia

Jauna zuekin. R/. Eta zure espirituarekin.

Makurtu burua Jaunaren bedeinkapena hartzeko.

(Eskuak herriaren gain zabalik bedeinkapena esango du:)

**Maria Birjina dohatsuagandik jaiotakoaren bitartez
gizadia bihotz onez salbatu duen Jainkoak
eman diezazuela oparo bere bedeinkapena.** R/. Amen.

**Bizi-iturria eman dizuen Mariaren laguntza
izan dezazuela nonahi eta beti.** R/. Amen.

**Eta Mariaren jaia santuki ospatzera etorri zaretenoi
eman diezazuela Jainkoak
Espirituaren poza eta zeruko sariaren dohaina.** R/. Amen.

**Bedeinka zaitzate Jaingo ahalguztidunak:
Aitak, eta Semeak, + eta Espiritu Santuak.** R/. Amen.

Zoazte Jaunaren bakean. R/. Eskerrak Jainkoari.